



4. marts 2016

UPA 2016/52

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matu-muuna saqqummiuppara:

Danmarkimi politini pisartutut Kalaallit Nunaanni politiit nalunaaruteqartoqarneraniit qisuarinissap tungaanut piffissamik atorneqartartumik nalunaarsuisalernissaat pillugu Naalakkersuisut danskit inatsisinik atortitsinermut ministerianut attaveqaqquillugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Justus Hansen, Demokraterne)

Tunngavilersuut

Rigs politeqarfiiup, Danmarkimi politit kredsii eqqarsaatigalugit, 2006-p naalerneraniit kalerrisaanerinerit aalaniutassat pillugit qisuarinissamut piffissaq atorneqartartoq nalunaarsortarpaa; tassa imaappoq piffissaq politiit kalerrinneqarneraniit pinerluffiusumut imaluunniit ajoquserfisumut anngunnissaasa tungaanut atorneqartartoq. Agguaqatigiisillugu politeqarfiiit ataasiakkaat qisuarinermut piffissaq atortagaat ukiut tamaasa tamanut saqqummiunneqartarpoq.

Politeqarfiiit tamarmik iliuuseqarnermut piffissaq atortagaat sivikilliartorsimavoq nalunaarsuisoqartalmalli. 2012-mi agguaqatigiisillugu qisuarinermut piffissaq atortagaq assersuutigalugu 8 min. aamma 35 sek. sivisussuseqarsimavoq - taamaasilluni tamanna 2007-mut naleqqiullugu 2 min. aamma 13 sek. pitsanngoriarneruvoq.

Naalakkersuisut § 37 naapertorlugu apeqquteqaatinnut (apeqqut nr. 195/2015) akissuteqarlutik oqaatigaat Kalaallit Nunaanni piffissaq qisuarinermut atorneqartartoq nalunaarsorneqarneq ajortoq aamma tamatuma aallartinnissaa pilersaarutaanngitsoq.

Taama isumaqarneq uggorntartutut isigaara. Innuttaasut erloqisut oqaatigisarpaat allaat minutut 30 -t 60-lu akornanni sivisutigisumi qisuarartoqarneq ajortoq. Tamanna ajorpoq, isumaqarpungalu sukkanerusumik qisuarartoqartalissagaluartoq pisut ataasiakkaat nalunaarsorneqartalertuugaluarpata.

Demokraatini soorunami paasisinnaavarput, maani nunami pissutsit immikkullarinneri pissutigalugit Danmarkimisut sukkatigisumik qisuarartoqartarsinnaanavianngitsoq. Innuttaasulli toqqisisimanissaannut pingaaruteqarpoq aamma persuttaasoqarnera pissutigalugu inuit akorngusersinnaanerisa pinngitsoortinnissaannut killilersimaarnissaannullu, aamma tillinniat tillitaminnut aallarussinissaasa pinngitsoortinnissaannut tillinniallu tigusarinissaannut pingaaruteqarpoq qisuarinissamut piffissap ingerlasup sivikinnerpaaffianiitinnissaa. Danmarkimi politeqarfiiit misilittagaasa takutippaat, qisuarinissap tungaanut piffissap



ingerlasarnerinik nalunaarsuisarneq iluaqutaasartoq, nalunaarsuisarnikkut nalilersortuarneqartarmat qisuariarnissamut piffissaq qanoq sivisutigisoq akuerineqarsinnaanersoq aamma qisuariarnissap tungaanut piffissap ingerlasartoq qanoq sivikillisarneqarsinnaanersoq. Aamma qisuariarnissap tungaanut piffissap ingerlasimaneranik nalunaarsuisarneq iluaqutaasarloq upalungaarsimanerup atuuttup nalilersorneqarneranut imaluunniit nukinnik allanik pisariaqartitsisoqarnersoq nalilersuinissamut.

Pisortanut aningaasaqarnikkut allaffissornikkullu kingunerisassai

Aningaasartuutit annikitsuaraassapput pineqartoq naalagaaffimmut tunngammat.

Inuussutissarsiornermut aningaasaqarnikkut allaffissornikkullu kingunerisassai

Soqanngilaq

Innuttaasunut aningaasaqarnikkut allaffissornikkullu kingunerisassai

Soqanngilaq

Taamatut oqaaseqarlunga Naalakkersuisut akissutissaannut kiisalu partiit allat oqaaseqaatissaannut qilanaarpunga.